



Bosnia and Herzegovina
Federation of Bosnia and Herzegovina

CANTON SARAJEVO
Anti-Corruption Office

Broj: 20.01-04-41164-11/25 A.A
Sarajevo, 06.03.2026. godine

Na osnovu člana 19. st. (1) i (2) i člana 23. Zakona o prevenciji i suzbijanju korupcije u Kantonu Sarajevo („Službene novine Kantona Sarajevo“, br. 35/22, 44/22-Ispravka i 52/22-Ispravka) Ured za borbu protiv korupcije Kantona Sarajevo donosi:

ODLUKU

(1) Nakon provedenog postupka utvrđivanja postojanja sukoba interesa za Đogić Amela, Ured za borbu protiv korupcije Kantona Sarajevo je utvrdio postojanje sukoba interesa za imenovanog, jer je isti kao nosilac javne funkcije, izvršni direktor-član uprave KJKP „Toplane-Sarajevo“ d.o.o. Sarajevo u svojstvu odgovornog lica u privrednom društvu SPEC SYSTEMS d.o.o. sklopio (zaključio) ugovor u vrijednosti većoj od 10.000,00 KM, i to u vrijednosti od 19.077,51 KM sa Ministarstvom privrede Kantona Sarajevo, institucijom iz člana 2. stav (1) tačka d) Zakona o prevenciji i suzbijanju korupcije u Kantonu Sarajevo koja se finansira iz budžeta Kantona Sarajevo, a što predstavlja kršenje člana 6. stav (2) Zakona o prevenciji i suzbijanju korupcije u Kantonu Sarajevo.

(2) Ured za borbu protiv korupcije Kantona Sarajevo je utvrdio da Đogić Amel nije podnio ostavku ili na drugi način odstupio sa nespojive funkcije iz člana 6. stav (2) ovog zakona, u roku od 30 dana nakon preuzimanja zadnje nespojive funkcije, a što predstavlja kršenje člana 6. stav (3) Zakona o prevenciji i suzbijanju korupcije u Kantonu Sarajevo.

(3) Novčanom kaznom u iznosu od 2.000,00 KM kaznit će se Đogić Amel zbog kršenja člana 6. stav (3) Zakona o prevenciji i suzbijanju korupcije u Kantonu Sarajevo, i to putem prekršajnog naloga izdatog od strane Ureda za borbu protiv korupcije Kantona Sarajevo.

O b r a z l o ž e n j e

Ured za borbu protiv korupcije Kantona Sarajevo zaprimio je 27.07.2025. godine anonimnu prijavu korupcije u kojoj se, između ostalog, navodi da Amel Đogić vrši nespojive funkcije u javnom preduzeću i privatnim preduzećima, na način jer je: direktor preduzeća Spec Systems d.o.o. i preduzeća Enterijer Dekor d.o.o, a istovremeno je i izvršni direktor za pravne i ekonomske poslove u KJKP „Toplane Sarajevo“ d.o.o. Sarajevo, što je u suprotnosti sa članom 6. stav (2) Zakona o prevenciji i suzbijanju korupcije u Kantonu Sarajevo, koji propisuje da nosilac javne funkcije za vrijeme vršenja javne funkcije, ne može biti predsjednik ili član skupštine privrednog društva u kojem posjeduje upravljački paket dionica, predsjednik ili član nadzornog odbora, uprave (menadžmenta), niti biti u svojstvu odgovornog lica privrednog društva koje sklapa ugovore u vrijednosti većoj od 10.000,00 KM godišnje, sa institucijama iz člana 2. stav (1) tačke d) ovog zakona ili sa institucijama koje se finansiraju iz budžeta na bilo kojem nivou vlasti u Bosni i Hercegovini.

U predmetu utvrđivanja postojanja sukoba interesa u ovom slučaju, a shodno članu 12. stav (1) Zakona o prevenciji i suzbijanju korupcije u Kantonu Sarajevo, Ured je pokrenuo i proveo postupak za utvrđivanje postojanja sukoba interesa u predmetnom slučaju. Rješenjem broj: 20-04-

41164/25 A.A. od 29.07.2025. godine pokrenut je postupak za utvrđivanje postojanja sukoba interesa za Đogić Amela.

Ured je aktom, Obavijest o pokretanju postupka za utvrđivanje postojanja sukoba interesa i zahtjev za pismeno izjašnjenje broj: 20-04-41164-1/25 A.A. od 29.07.2025. godine, a shodno članu 16. stav (1) Zakona o prevenciji i suzbijanju korupcije u Kantonu Sarajevo, obavijestio imenovanog o pokrenutom postupku za utvrđivanje postojanja sukoba interesa, i zatražio pismeno izjašnjenje na navode iz ove obavijesti. U prilogu navedene obavijesti imenovanom je dostavljeno Rješenje broj: 20-04-41164/25 A.A. od 29.07.2025. godine.

Izjašnjenje na navode iz Obavijesti o pokretanju postupka za utvrđivanje postojanja sukoba interesa i Zahtjev za pismeno izjašnjenje od strane Đogić Amela, ovaj ured je zaprimio 11.08.2025. godine. U Izjašnjenju imenovani ističe da je u skladu sa navodima iz predmetnog rješenja, kao i obavezama propisanim članom 16. Zakona prestao obavljati funkcije direktora i zakonskog zastupnika u sljedećim privrednim subjektima: Enterijer Dekor d.o.o. i Spec Systems d.o.o. U Izjašnjenju imenovani nosilac javne funkcije navodi da je na ovaj način u cijelosti otklonjena mogućnost postojanja sukoba interesa, obzirom da isti više ne obavlja funkcije u navedenim privrednim subjektima, niti je u statusu odgovornog lica u istim.

U cilju pravilnog i zakonitog odlučivanja u predmetnom slučaju, Ured je uputio Zahtjev za pojašnjenje odredbi Zakona o prevenciji i suzbijanju korupcije u Kantonu Sarajevo, broj: 20-02-41164-4/25 A.K. od 18.08.2025. godine, Ministarstvu pravde i uprave Kantona Sarajevo, i to sa upitom da li se pod pojmom sklapanja ugovora o pružanju ličnih usluga podrazumijevaju i ugovori o dodjeli poticajnih sredstava po javnim pozivima gdje se kao ugovorna strana pojavljuje korisnik sredstava-pravno lice čiji je zastupnik-direktor nosilac javne funkcije, shodno članu 8. stav (1) i (2) Zakona.

Dana, 05.09.2025. godine, Ured je zaprimio Odgovor Ministarstva pravde i uprave Kantona Sarajevo broj: 03-04/1-02-43269/25 od 02.09.2025. godine, u kojem se navodi da član 2. stav (1) tačka r) Zakona jasno propisuje da lična usluga podrazumijeva svako djelovanje kojim se nosilac javne funkcije obavezuje, uz naknadu ili drugu protuuslugu, obaviti određeni posao za institucije iz tačke d) ovog člana ili privredno društvo koje sklapa ugovore ili na drugi način posluje sa institucijom u kojoj nosilac javne funkcije vrši javnu funkciju, a koja ne proizilazi iz javne funkcije. Dakle, ključna pretpostavka je da se posao obavlja lično od strane nosioca javne funkcije za instituciju iz člana 2. tačka d) Zakona, odnosno privredno društvo koje sklapa ugovore ili na drugi način posluje sa institucijom u kojoj nosilac javne funkcije vrši javnu funkciju, a koja ne proizilazi iz javne funkcije, te da za taj posao nosilac javne funkcije dobija naknadu ili protuuslugu.

Na osnovu dostupnih podataka, Ured je utvrdio da je Đogić Amel kao nosilac javne funkcije, izvršni direktor-član uprave KJKP „Toplane-Sarajevo“ d.o.o. Sarajevo, u svojstvu odgovornog lica u privrednom društvu SPEC SYSTEMS d.o.o. sklopio ugovor u vrijednosti od 19.077,51 KM sa Ministarstvom privrede Kantona Sarajevo.

Ured je aktom, Zahtjev za dostavljanje podataka broj: 20-04-41164-5/25 A.K. od 12.11.2025. godine, zatražio od Općinskog suda u Sarajevu, Odjeljenja Registra za upis pravnih lica, da Uredu dostave podatak o statusu registracije Spec Systems d.o.o., i to podatak da li isto ima status privrednog društva, shodno podacima evidentiranim u Registru poslovnih subjekata koje vodi predmetni sud.

Općinski sud u Sarajevu je 03.12.2025. godine dostavio traženi podatak Uredu, u aktu broj: 065-0-RegZ-25-014440 od 01.12.2025. godine, a u istom se navodi da je predmetno društvo u skladu sa važećim propisima, upisano u sudski registar kao privredno društvo, te registrovano shodno odredbama Zakona o privrednim društvima Federacije Bosne i Hercegovine („Službene novine FBiH“, br. 81/15 i 75/21). U prilogu navedenog akta dostavljen je Aktuelni izvod iz sudskog registra za Spec Systems d.o.o. u kojem se između ostalog navodi da su lica ovlaštena za zastupanje subjekta upisa – Mirza Đogić kao direktor, bez ograničenja ovlaštenja.

Ured se Zahtjevom za dostavljanje informacije i dokaza broj: 20-02-41164-6/25 od 19.11.2025. godine obratio Ministarstvu privrede Kantona Sarajevo radi dostavljanja informacije da li je Ministarstvo privrede Kantona Sarajevo u periodu od 01.01.2023. godine do dana dostavljanja ovog zahtjeva sklapalo ugovore o dodjeli poticajnih sredstava po javnim pozivima sa **Spec Systems d.o.o.**, te ukoliko jeste da Uredu dostavi primjerke tih ugovora.

Ministarstvo privrede Kantona Sarajevo je 01.12.2025. godine dostavilo Uredu Odgovor broj: 07-06-20-41164-7/25 A.K. od 27.11.2025. godine u kojem se navodi da su **Ministarstvo privrede Kantona Sarajevo i pravno lice Spec Systems d.o.o.**, ID broj: 4203031070000, u periodu od 01.01.2023. godine do dana sačinjava predmetnog akta, **zaključili jedan ugovor, i to Ugovor o dodjeli poticajnih sredstava po Javnom pozivu za dostavljanje prijave za refundiranje troškova tehnološke modernizacije, uvođenja/obnavljanja standarda kvaliteta i digitalizacije poslovanja**, broj: 07-05-15-30239-2/24 od 30.05.2024. godine od 30.12.2024. godine. U članu 2. predmetnog ugovora navodi se da poticajna finansijska sredstva za subvencioniranje/refundiranje dijela prihvatljivih troškova korisnika sredstava Spec Systems d.o.o. dodjeljuju se istom u iznosu od 19.077,51 KM.

Ured je aktom, Zahtjev za dostavljanje informacije i dokaza broj: 20-02-41164-7/25 A.K. od 19.11.2025. godine, zatražio informaciju od Općinskog suda u Sarajevu, Odjeljenja Registra za upis pravnih lica ko je bio upisan kao odgovorno lice u Spec Systems d.o.o. na dan 30.12.2024. godine, odnosno ko je odgovorno lice na dan dostavljanja Zahtjeva.

Općinski sud u Sarajevu je 22.12.2025. godine dostavio Uredu traženu informaciju u aktu Historijski izvod iz sudskog registra broj: 065-0-RegZ-25-014731 od 15.12.2025. godine, u kojem se između ostalog navodi da su Rješenjem Općinskog suda u Sarajevu, broj: 065-0-Reg-23-000245 od 14.02.2023. godine, u reg. ulošku broj: 65-01-0338-22 u sudskom registru upisani podaci o promjeni osnivača, promjeni firme, promjeni sjedišta, promjeni lica ovlaštenog za zastupanje (direktor) i dopuni djelatnosti društva pod nazivom Spec Systems Društvo sa ograničenom odgovornošću, skraćeni naziv Spec Systems d.o.o., sa sjedištem u ulici Humska broj 20, Sarajevo, Sarajevo – Novo Sarajevo. *Osnivač subjekta upisa prema ovom rješenju je Amel Đogić, sa visinom kapitala u iznosu od 1.000,00 KM ili 100%. Lice ovlašteno za zastupanje subjekta upisa je Amel Đogić, direktor bez ograničenja ovlaštenja.*

Rješenjem Općinskog suda u Sarajevu, broj: 065-0-Reg-23-002058 od 23.05.2023. godine, u reg. ulošku broj: 65-01-0338-22 u sudskom registru upisani su podaci o promjeni adrese sjedišta društva, kod subjekta upisa pod nazivom Spec Systems Društvo sa ograničenom odgovornošću, skraćeni naziv Spec Systems d.o.o., sa sjedištem u ulici Džemala Bijedića broj 162, Sarajevo, Sarajevo – Novi Grad. Rješenjem Općinskog suda u Sarajevu, broj: 065-0-Reg-23-004097 od 11.12.2023. godine, u reg. ulošku broj: 65-01-0338-22 u sudskom registru upisani su podaci o promjeni osnivača prenosom udjela u društvu kod subjekta upisa pod nazivom Spec Systems Društvo sa ograničenom odgovornošću, skraćeni naziv Spec Systems d.o.o., sa sjedištem u ulici Džemala Bijedića broj 162, Sarajevo, Sarajevo – Novi Grad. Prema ovom rješenju osnivač subjekta upisa je Mirza Đogić, sa visinom kapitala u iznosu od 1.000,00 KM ili 100%.

Dalje se navodi, da je Rješenjem Općinskog suda u Sarajevu, broj: 065-0-Reg-25-003278 od 28.08.2025. godine, u sudskom registru upisani su podaci o promjeni lica ovlaštenog za zastupanje društva (direktor), kod subjekta upisa pod nazivom Spec Systems Društvo sa ograničenom odgovornošću, skraćeni naziv Spec Systems d.o.o., sa sjedištem u ulici Džemala Bijedića broj 162, Sarajevo, Sarajevo – Novi Grad. Lice ovlašteno za zastupanje subjekta upisa u unutrašnjem i vanjskotrgovinskom prometu je Mirza Đogić, direktor bez ograničenja ovlaštenja.

Ured se aktom, Zahtjev za dostavljanje podataka, broj: 20-02-41164-8/25 A.K. od 19.11.2025. godine, obratio KJKP „Toplane-Sarajevo“ i zatražio informaciju ko su sve bili članovi uprave – direktori i izvršni direktori na dan 30.12.2024. godine u ovom preduzeću, odnosno ko su aktuelni na dan dostavljanja ovog Zahtjeva.

Dana, 01.12.2025. godine, Ured je zaprimio tražene podatke od KJKP „Toplane-Sarajevo“ d.o.o. Sarajevo, akt broj: 03-02-01-6176/25 od 27.11.2025. godine, u kojem se navodi da je član

uprave KJKP „Toplane-Sarajevo“ d.o.o. Sarajevo, na dan 30.12.2024. godine, bio i Đogić Amel, Izvršni direktor pravnih, općih i ekonomskih poslova.

Na osnovu dostupne dokumentacije a nakon provedenog postupka utvrđivanja postojanja sukoba interesa za Đogić Amela, Ured je utvrdio postojanje sukoba interesa za imenovanog, jer je isti kao nosilac javne funkcije, izvršni direktor-član uprave KJKP „Toplane-Sarajevo“ d.o.o. Sarajevo u svojstvu odgovornog lica u privrednom društvu SPEC SYSTEMS d.o.o. sklopio (zaključio) ugovor u vrijednosti većoj od 10.000,00 KM, i to u vrijednosti od 19.077,51 KM sa Ministarstvom privrede Kantona Sarajevo, institucijom iz člana 2. stav (1) tačka d) Zakona o prevenciji i suzbijanju korupcije u Kantonu Sarajevo, institucijom koja se finansira iz budžeta Kantona Sarajevo, a što predstavlja kršenje člana 6. stav (2) Zakona o prevenciji i suzbijanju korupcije u Kantonu Sarajevo.

Član 6. stav (2) Zakona o prevenciji i suzbijanju korupcije u Kantonu Sarajevo glasi: „Nosilac javne funkcije, za vrijeme vršenja javne funkcije, ne može biti predsjednik ili član skupštine privrednog društva u kojem posjeduje upravljački paket dionica, predsjednik ili član nadzornog odbora, uprave (menadžmenta), niti biti u svojstvu odgovornog lica privrednog društva koje sklapa ugovore u vrijednosti većoj od 10.000,00 KM godišnje, sa institucijama iz člana 2. stav (1) tačke d) ovog zakona ili sa institucijama koje se finansiraju iz budžeta na bilo kojem nivou vlasti u Bosni i Hercegovini“.

Dalje, Ured je utvrdio da Đogić Amel nije podnio ostavku ili na drugi način odstupio sa nespojive funkcije iz člana 6. stav (2) ovog zakona, u roku od 30 dana nakon preuzimanja zadnje nespojive funkcije, a što predstavlja kršenje člana 6. stav (3) Zakona o prevenciji i suzbijanju korupcije u Kantonu Sarajevo.

Član 6. stav (3) Zakona o prevenciji i suzbijanju korupcije u Kantonu Sarajevo glasi: „Nosilac javne funkcije dužan je podnijeti ostavku na jednu od nespojivih funkcija ili na drugi način odstupiti sa nespojive funkcije, u roku od 30 dana nakon preuzimanja zadnje nespojive funkcije.

Zbog kršenja navedenih zakonskih odredbi, novčanom kaznom u iznosu od 2.000,00 KM kaznit će se Đogić Amel, i to putem prekršajnog naloga izdatog od strane Ureda za borbu protiv korupcije Kantona Sarajevo.

Član 65. stav (3) tačka c) Zakona o prevenciji i suzbijanju korupcije u Kantonu Sarajevo glasi: „Novčanom kaznom u iznosu od 2.000,00 KM do 10.000,00 KM kaznit će se za prekršaj nosilac javne funkcije, ako ne podnese ostavku ili na drugi način ne odstupi sa nespojive funkcije iz člana 6. st. (1) i (2) ovog zakona, u roku od 30 dana nakon preuzimanja zadnje nespojive funkcije (član 6. stav (3) ovog zakona).

Shodno navedenom, Ured za borbu protiv korupcije Kantona Sarajevo je u skladu sa članom 19. st. (1) i (2) Zakona o prevenciji i suzbijanju korupcije u Kantonu Sarajevo odlučio kao u dispozitivu ove odluke.

Ova odluka stupa na snagu danom donošenja i obavezujuća je za nosioca javnih funkcija.

Pouka o pravnom lijeku: Ova odluka je konačna i protiv iste nosilac javnih funkcija može pokrenuti upravni spor.

ŠEF UREDA
Erdin Kafeđžić

Dostaviti:

1. Imenovanom (Amel Đogić, 5., 71 000 Sarajevo),
2. Za objavu na internet stranici Ureda za borbu protiv korupcije Kantona Sarajevo,
3. a/a.

